

清王文清撰 黄守红校点

王文清集

二

湖湘文库编辑出版委员会 岳麓书社

文庫

湖湘

〔清〕王文清撰  
黄守红 校点

# 王文清集

〇

湖湘文库编辑出版委员会  
岳麓书社



湖湘文库  
甲编

图书在版编目 (CIP) 数据

王文清集/(清)王文清撰.—长沙:岳麓书社,2013.5

ISBN 978-7-5538-0033-2

I. ①王… II. ①王… III. ①王文清(1688~1779)—文集

IV. ①Z424.9

中国版本图书馆 CIP 数据核字(2012)第 277532 号



湖湘文库

湖湘文库编辑出版委员会

王文清集



据湖南图书馆藏本校点

作者 (清)王文清

校点 康守红

责任编辑 马美著 刘文

特邀编辑 蔡志斌

整体设计 郭天民

出版发行 岳麓书社

网 址 <http://www.yueluhistory.com>

地 址 湖南省长沙市爱民路47号

邮 编 410006

电 话 0731-88885616(邮购)

经 销 湖南省新华书店

印 刷 湖南天闻新华印务有限公司

版 次 2013年5月第1版第1次印刷

开 本 960×640 1/16

印 张 62

字 数 750千字


书 号 ISBN 978-7-5538-0033-2/Z·25

定 价 138.00元

如有印装质量问题,请与承印厂调换

厂址:湖南·望城·湖南出版科技园 电话:0731-88387860 邮编:410219

ISBN 978-7-5538-0033-2



9 787553 800332 >

# 锄经续草



## 锄经续草卷之一

### 和学徒荣柱别诗兼送其北上

挥手旗亭畔，回头共黯然。桂林香寂寂，星洞月娟娟。发白吾垂老，衫青尔少年。行藏谁料得，去去楚江天。

从游休恨晚，吾道日方中。豪杰师何事，文章法总同。南天瞻北斗，秋色舞春风。九寸黄钟管，吹来万窍通。

楚粤水浮浮，连年为尔留。眼空千古事，人上几层楼。薪木馀苍色，高堂已白头。此行期万里，飞棹上瀛洲。

江干逢岁暮，扶杖意何如。不学龙钟状，时摊虎观书。金针曾度世，皇路久悬车。忽作同游梦，携君到石渠。

### 和学徒陈士琪诗即送其北上<sub>琪闽士</sub>

万里从游晚，心期不偶然。道传垂老日，人共暮春天。学海难为水，濠梁弗用筌。坐间谁变色，谈虎意恹恹。

鹿豕何能聚，轻帆趁好风。人归漓水北，天入楚江东。染薄丝还白，繁孤烛减红。行藏消息杳，回首暮云中。

不悲迟暮景，吾道一虚舟。阆苑无青鸟，江天下白鸥。六经元我注，百谷自同流。倾盖陈琳好，偕登万仞楼。

揽辔从兹始，雄心我不如。且酬先世事，还读古人书。天地留刍狗，风云入草庐。潜夫睁老眼，难负是三馀。

### 赠学徒盛德

肝胆君偏热，昂藏学虎臣。毛锥焉足用，宝剑付何人。可有封侯志，应为报国身。最怜公子伴，擎鹄送青春。

### 衡阳道中野望有感

一望衡阳道，山思寸草春。南天同雨露，此地旧雷陈。予与段柱湖、唐人岸、周芾斯、刘匪石、彭克家、丁少微皆夙好。人满无馀蓄，年丰不救贫。长林悲濯濯，空忆昔轮囷。时衡大歉。

### 过衡山道忆彭克家

杳杳衡隄子，伤心只老夫。君今森墓木，我亦厌驰驱。骨肉闻新鬼，君丧两令嗣。文章剩故吾。祝融空久约，不得共斯须。

### 过花石戍，时自粤还

不图垂老客，又得返江乡。湘水流何亟，苍梧路已长。梅从正月折，橘送九秋香。宿处吟花石，人同古戍荒。工部有《宿花石戍》诗。

### 闻彭傲三亲家归信二首

闻说巴州使，南归近有期。燕鸿难一面，楚蜀久相思。白首

应如我，青山待几时。涿江舟正稳，消息遣吾儿。枢儿其婿。

吾儿曾作客，才自粤西归。陟屺谋将母，占星祝少微。负薪  
渐长大，同学尽轻肥。如意今欢舞，床东共彩衣。

### 涿州怀古

开辟驱戎首，于今剩故城。褙旗传旧制，遁甲创奇兵。阵散  
笑云拥，营荒落照横。武功从此始，万古救苍生。

### 有感

夭桃零落尽，柳色尚青青。同在秋光里，风来各自听。

### 空钟鸽三绝句

带得洪声两翼间，不栖湖海不栖山。家鸡野鹜休争食，独夜  
云中奏罢还。

谁奏钧天到夜残，高音缥缈下云端。时人莫作仙禽看，犹向  
樊笼集羽翰。

偶向寒空试一声，儿童相唤莫相惊。人间歌舞多弦管，焉用  
翛翛两翻鸣。

### 新月<sub>乙亥秋</sub>

一望团团后，朦胧又至今。高楼人自老，空谷尔相寻。未放  
清辉毅，遥同冷淡心。边庭犹未静，好去照秋砧。



## 九月见桃花二首

尔开何太晚，万卉久秋声。不送风流客，犹含妩媚情。刘郎宁再到，渔子莫须惊。为问玄都观，今曾剩落英。

丛菊开残日，胡为赏未休。年光留二月，春色入三秋。洞口津何处，河阳种不收。风来重结子，莫向五更愁。

## 夜吟

萧萧听落木，莫问夜何其。仰视浮云白，飘飘任所之。

## 少年行

生缚左贤王，不曾持寸铁。奴子敢一作稍言功，鞭出两腮血。

卷甲阴山下，边风六月寒。将军新有令，不许斩楼兰。

## 草堂杂咏

断桥疏柳外，茅屋老夫家。健妇能丸药，痴儿学种瓜。自怜秋色晚，偏爱夕阳斜。问子何方客，云深路易差。

## 寄晚汀老友

弱冠踰跼五十秋，可堪回首说休休。久怜白发无公道，自怪青鞋已倦游。暮雪晴岚何处是，老龙飞虎至今留。儿曹莫问平生业，请看清湘万古流。

## 闰九月丙子

重阳能再到，壮岁肯还来。天气高偏冷，秋风落更哀。最怜残圃物，又殿晚芳开。前月茱萸酒，霜中续举杯。

## 秋兴

秋气纷萧瑟，吾心独未然。野云依旧淡，岭月自能圆。马革沙场梦，龙图玉宇天。一枝栖故稳，摇落为谁怜。

## 丙子即事

七旬明岁到，药饵复何为。为萃千秋业，聊求百草师。金精怜我晚，玉液笑谁痴。蒸晒劳诸妇，方书枕篋知。

挑灯还问我，方寸可应安。糊口非吾事，传心自古难。秋风惊木落，江月射窗寒。击节频相赏，钟声夜未残时辞西席之聘。

## 偶兴

藜杖摩挲久，行行何所之。身因劳后健，心为用多疲。麋鹿吾朋友，鸛鷓尔一枝。五云书再到，正是闭门时。

## 对镜

一对一番老，春秋我自知。须眉元自古，筋骨旧来疲。莫问行藏事，差无宠辱思。朱颜当日好，重见是何时。

## 柳叹

依依青未了，飞处已如棉。为漏三春早，应衰万木先。孤蓬

宁自惜，青眼几人怜。涧底寒松在，嗟君伴几年。

### 山寺晚钟

何处音传迥，凭高大扣危。风飘残月动，响入九霄迟。金阙朝元后，寒山夜半时。声声敲百八，此意老僧知。

钧天何处发，古寺晚山横。高响从空震，凡金不敢鸣。三更幽梦断，十月晓霜清。一动蒲牢吼，偏收万籁声。

396

用自箫韶日，流传物外清。八音虽始作，大乐此先声。萧寺烟云静，深山魍魉惊。忽闻龙象泣，胆落在初更。

### 别墅

便作菟裘意，披衣且徜徉。三间蜗壳屋，四面薜萝墙。已是新秋节，犹闻旧瓮香。儿童问报到，有客自沧浪。

### 遣兴

亩亩从容惯，几忘化日舒。扶持辞药饵，衣食付妻孥。偶作三山梦，闲观九老图。亦知筋骨健，心自厌驰驱。

### 怀人

宦海多年客，可怜犹未归。须眉应似旧，踪迹却全非。三径松方老，长江蟹正肥。故人今尚健，翘首钓渔矶。

### 即事有感

此中原洒落，焉用听笙歌。白日浮沉短，朱门醉饱多。自甘

长寂寞，片刻忍蹉跎。檀板催红烛，摇头奈尔何。

## 丁丑元旦

儿时竹马事依依，岂料残年竟古稀。青鸟几时来探信，白鸥如我亦忘机。文章流播心增愧，儿女团圞愿未违。莫为往来锄小径，薛萝无刺不牵衣。

廿年臣职素餐多，自问经生事若何。老去未忘殉马革，清时亦自恋渔蓑。朝宗北极争来享，唾手西征望息戈。邸报览馀频击节，岂徒青海不扬波邸报西捷。

捷径纷纷尽子虚，空怜若辈意何如。北门但愿无交谪，东郭谁羞饱祭馀。皂隶自忘栾武后，临淄旧是爽鸠居。升平难报惟行乐，南顾焦劳尚未纾。

分形同气绿衣郎，何事相看鬓尽苍。每叹痴心思大被，孰怜糊口亦空囊。先畴尚在犹堪共，后起何如好自强。早晚殷勤无别嘱，紫荆花树正苍凉。

## 答醒道人

尘榻无人扫，秋山共寂寥。偶然思导引，何必寿松乔。物自先天老，江通大海潮。谷神如不死，终日共逍遥。

## 示学徒论诗

卅音集，“四十”字合也。载登坛客，弨弓此日爨。自惭窥汉魏，况敢续风骚。格调还前辈，聪明让尔曹。当年曾唾干，转眼是

霜毛。

## 退步

举头红日已三竿，睡起先生护薄寒。木落风高知岁晚，水流花谢又春残。在家转痛居停苦，有病方嗟健步难。曾学玄元先退步，十年无梦过邯郸。

## 自遣

平生沧海意，鹿豕自为群。径满堆黄叶，门开扫白云。读书风揭卷，写字月临文。几许升沉事，潜夫德不闻。

398

## 客至

此心无着任西东，今古茫茫马耳风。千里容寻芳草外，深山家在绿杨中。莫愁短发随秋白，且喜衰颜得酒红。屈指纷纷蛮触队，可怜黄土总成空。

## 蓬门

蓬门虽扫不轻开，野老披衣独往来。树长新枝曾待剪，笋传邻竹莫须栽。岭头寒色云生岫，池上清光月满台。夜指少微星在否，免从南斗望三台。

## 答故人见讯

十亩闲闲梦不惊，云霄书见故人情。干旄几度传黄纸，霜鬓何年到赤城。坐看园丁栽树法，卧听孙子读书声。昨宵彻晓催春雨，报道山田正好耕。

## 小园

科头老子灌荒园，剪尽荆榛补败垣。圃内何年成杞梓，锄时聊此课儿孙。五湖屣遍身犹健，万事心灰骨仅存。为语小丁关闭早，偶逢野叟亦开门。一作“莫因冠盖浪开门”。

## 偶兴

岁暮光阴不肯留，七旬老子坐虚舟。痴心尽欲成黄耇，薄命何曾到白头。自（值）〔植〕小松迎早露，别栽新桂待深秋。白鸥知我来相问，曲曲晴川日夜流。

399

## 浮生

坐上杯中笑孔融，浮生今欲付秋风。门前莫问登龙客，塞下空随失马翁。药有秘方难施去声济，囊无馀物惯蒿蓬。他年殉我应何物，六部遗经一酒筒。

## 答友人

十载曾游七里滩，腐儒自量早辞官。尚方爵秩原堪爱，下士渔樵亦自安。山曲风光和我暖，江村月色照人寒。即今洞口藤萝满，总有尘冠不再弹。

## 辞某宪府西席之聘

残年葆得旧胚胎，木雁之间才不才。好雨洒时三径滑，春风摇处百花开。自惭到老还糊口，始悔从前未凿坏。为谢多情贤宪府，布袍蔬食早安排。

## 寄友

同官频约共抽身，林下何尝问结邻。波底尚看前夜月，镜中不似少时人。手酸犹爱抄金匱，秃笔空惊对白麟。幸际升平添岁序，杖藜扶我趁残春。

## 考槃送友人

考槃人在乱山溪，事业文章莫浪题。寒到趁晴移韭本，春深乘雨种松楸。漫闻市马悬金去，好学（铃）〔矜〕羊树角栖。霜露沾衣来路滑，石桥流水恐相迷。

400

## 答少年某友

无才不敢逐三豪，更为何人解佩刀。射斗尚馀藜杖阁，韬兵焉用鹤鹑膏。笙歌队里寻清瑟，罗绮丛中一布袍。芳草暮春风色好，尔曹何事苦牢骚。

## 山中即事

溪头石露任沙飞，山岫云封带雨归。寄语往来诸老友，蔷薇有刺莫牵衣。

## 平生

海内浮名满，平生自寡交。有人能结袜，无术代充庖。大汉多龚鲁，陶唐爱许巢。北山猿鹤在，逋客免相嘲。

## 种树

贪爱园林好，频谋种树方。残冬知腊破，白发趁年芳。觅自

先春种，栽从晚照堂。斜桥新柳绿，曲径小梅香。

### 雪晴喜斋澹过访

日色熏熏薄，山容澹澹开。如何寒节后，尚有故人来。盘冷无兼味，尊盈只拨醅。莫续阳春调，长歌上吹去声台。

### 老友到喜赋

山犬毋轻吠，柴门岂浪开。无端尘榻上，忽报老生来。书自何年寄，人从万里回。可怜筋骨瘦，相见转增哀。

### 迎春

圣主当阳日，王春应节时。土牛驱北里，保介向东菑。万物迎和气，千郊逮我私。献暄臣已老，冻解砚先知。

### 孀媳黄氏孙人骏母烹肴来奉有感

一滴伤心痛九原，至今九载耐寒温。为愁霜露沾孤树，常念晨昏到寝门。姑病是谁供俎豆，儿亡有汝奉鸡豚。皇天老眼分明见，报尔殷勤在子孙。

### 戊寅元日自咏

弹冠弹剑事如何，独喜衡门自在多。椿树灵根还烂漫，棗花天气正晴和。痴儿亦欲传三礼，盛世无劳诵九歌。紫雾白云环几杖，始知安乐可为窝。

### 漫兴

孔孟乡中颠倒过，曹刘何物敢谁何。蹉跎常恨分阴短，取与



偏争一介多。履虎噬人堪战栗，元龙豪气暗消磨。不知大雅须张主，请看江流日夜波。

### 寄子婿彭坊

七旬祝罢又经春，书到遥怜念我真。羨尔前贤能有子，知子后起属何人。十年未见衡山面，百岁犹存锦里巾。齿发萧萧吾已老，东床只望结东邻。

### 忆岳麓同学诸生

讲席才收路已封，十年人竟学痴龙。战馀欲误军中鼓，梦里时闻夜半钟。玉露应沾三秀草，碧云犹护六朝松。同人莫访先生处，钢瓦桥边一老农。

### 酬学徒周十三在焯韵

云澹天间日色薄，北窗人梦游河洛。醒时风雨正相催，一函书自友人来。友人年少衣缝掖，友人才长遭勒帛。元经肯注隐王通，乐府不学育张籍。岳麓从游盛昔时，子自后来能夺席。子有昆季何峥嵘，裁缝尽度针线迹。时兄弟四人来学，俱入彀。岁寒木落各还家，从兹挥手成今昔。举头井里接风烟，岂意十霜音讯隔。扬镳千里驰骅骝，老驼闭目知泉脉。六经烟海愧茫茫，时流浪许文章伯。聊相交章荐腐儒，枉劳人士手加额。己巳蒙史、阿、梅诸公三荐经学，诏书到日，适值丁艰。栌栌棘人苦块馀，尽有长风何忍借。东皋春雨一犁中，黄犊青刍时负轭。朝报颁传礼乐编，一十二年辛苦释。时颁刻三礼、律吕、经史诸书。考古书成卷五百，卉之精英狐之腋。百家有此得源流，敢谓补天需白石。铁裹层层井十丈，郑孔有知应返魄。闻子年来苦用心，苍萃古今终岁夕。载酒莫问子云亭，濯足